

इलिशबेत सारुंग महिना मेन्दुलते आस मता असके परमेस्वरनिकेडाल
वरोर जिब्रायिल पोरोयतोर स्वरगदूततुन, गलील प्रदेशता नासरत
सेहेरतिगा, यहुदि लोकुरा राजाल मतोर दावुदना वंशातोर यूसुफ
पोरोयतोर वरोर मानेयनासंग हेनांग-मंगळिंग किस मता उन्दि कुवारि
लेयाना हेरे परमेस्वर लोहतुर अनि अद कुवारि लेयाना पोरोय मरियम
मता।



स्वरगदूत मरियमिन इतुर, “हे मरियम, वरियमा,
बाक्याकि परमेस्वरना अनुग्रह नियागा आता।
हुळा! निमा मेन्दुत आयकि, अनि वरोर नुनान
जनम हियाकि; अनि ओना पोरोय निमा
येसु इरकि। येर हजोर आयनुर अनि
सबोयताल हजोर परमेस्वरनोर मरि
इन्दाहनुर। अनि प्रबु परमेस्वर बदाम
दावुदिन राजाल बनेहकितुर अदाम
लेहका येसुन वने राजाल बनेहकियानुर,
अनि येर इस्रायेल लोकुरा पोरो दरोज साटि
राज कियानुर; अनि ओना राज्य बसकेय मारो
आयार” इदाम स्वरगदूत मरियमिन इतुर।



असके मरियम स्वरगदूततुन इतु, “इद बदाम
आयार। नना ते बोरे मानेयसंग इदाम समन्द
इरोने।” स्वरगदूत मरियमिन इतुर,
“परमेस्वरना पवित्र आत्मा नियागा रयार,
अनि सबोयताल हजोर परमेस्वरना लाव
नियागा मन्दार। इन्जोर जनम
आयवाल पवित्र नुनाल
परमेस्वरनोर मरि इन्दानुर।”



अनि अदेदियाते मरियम सान्डे तयार आसुन यहुदि
लोकुरा उन्दि मटा देशता सेहेरतिगा हतु, अनि मरियम
जकरयाना लोतिगा हन्जुन इलिसिबान नमस्कार कितु।
इलिसिबाल मरियमना नमस्कार
कियाना लेंगदुन केन्जतु असके
इलिसिबाना पोटातिगा नुनाल
करसिला लाकतु, अनि
इलिसिबाल परमेस्वरना
पवित्र आत्माता पुरा
नियन्त्रणते आतु। अनि
इलिसिबाल पकायगिरिदाते
मरियमिन हजोर लेंगदे इन्ताः
“निमा सबोय आसकनिके
डाल धन्य मन्तोन, निमा



जनम हियाकि अद नुनालतुन
परमेस्वर अनुग्रह कितोर!



येसु मसिना जनम इद प्रकारते आता। येसुना अवहारि मरियम
युसेफनासंग हेनांग-मंगळिंग आतपा
ओरक उन्दि आयानाता मुनेय ओद
पवित्र आत्माता लावते मेन्दुलते
आतु इन्जोर हुळतुर। अदेनोर
मुजो यूसुफ परमेस्वरना
नियमतुन सोबाय
मानेमायवाल मतोर अनि
अदेना बदनामि कियाना
इच्चा केवोर इन्जोर अदेन
कमेक तासियाना विचार कितुर।



ओर इव पोल्लोनांग विचार किन्दुर असके प्रबुनोर स्वरगदूत ओन कनिष्कान बेरा दिस इतुर, “हे दावुदनोर मरि यूसुफ, निमा मरियमिन आपुना मुत्ते कियाला वरियमा, बाक्याकि अदेना पोटालोपा मन्तोर नोनाल पवित्र आत्माता लावते उत्पन्न आतोर। ओद वरोर पेकान जनम हियार अनि ओर आपुना लोकरकुन ओरा पापताल पिसहानुर इन्जोर निमा ओना पोरोय येसु इरकि।”



असके यूसुफ हुन्जताल तेदस प्रबुनोर दूत आग्या हितोर लेहका
मरियमिन मरमिंग किस, आपुना मुत्ते आस ओना लोन ततुर।
अनि ओद पेकान जनम हेवो अचोन वनाह अदेन
इटोर आतुर, ओद पेकान जनमा हितु
असके ओना पोरोय येसु इरतुरका।



अद बेरा रोमि देशतोर सबोय लोकरक ओरा पुरकातोरक बगा मन्तोरक
अगा हन्जुन आपुनांग पोरुय कोटहिर इन्जोर रोमि देशता हजोर
राजाल ओगुस्तुस निकेडाल
उन्दि आग्या पसियतु। इन्जोर
आपुना पोरुय
कोटहान साटि
सबोय लोकरक



आप-आपुना नाटेनिके अनि सहेरतिके हतुरक।



अनि यूसुफ वने दावुद राजाना परिवारता अनि वंशतोर मतोर इन्जोर
पोरोय कोटान साटि, ओर गलील प्रदेशता नासरत सहेरतिगाडाल
पसियसुन दावुद राजाल जनम
आतोर येहुदि प्रदेशता बेलहेम
सेहेरतिगा हतुर।
ओनासंग मरमिंग
साटि



हेनांग-मंगळिंग किस मता
मरियम ओनासंग मता। अद मेन्दुत मता।



यूसुफ अनि मरियम बेतलहेम
सहेरतिगा मतोरक असके
मरियम आपुना नुनालिन
जन्मेमायाना दियांग पुरा
आतुंग, अनि मरियम आपुना
पहले मरिन जनम हीत।



अनि ओरकुन बेतलहेमतिगा मन्दाना साटि विशराम गुह
बगाय पुटो इन्जोर चवातुन जुन्हीते हरिचुन कोळकातिगा इरतु।



अनि अद प्रदेशता हेरे पकाय बेळांग मेहवालोर मतोरक, अद दिया
ओरक नरका पल्लातिगा आपुनांग बेळाना गोहडि केपिन्दुरक। असके
प्रबुना उन्दि दूत ओरा मुने दिसतु, असके प्रबुना
वेळिचि ओरा हिरमुटा मांचतु,
अनि ओरक
पकाय जाक
आहचतु।



ओद स्वरगदूत ओरकुन इन्ता, “वरियमाटा पकाय ध्यानकिस केन्जाट,
नना सबोय लोकरकुन पकाय गिरिदा हिन्ता उन्दि सोबाता पोल्लो
वेहका। नेन्ड दावुद राजाना बेतलहेम सेहेरतिगा
मिया साटि वरोर पिसिहवाल

जनमेमातोर।
ओरे प्रबु
मसिहाल आन्दुर।
अनि जुन्हीते
हरिहच +

कोळकातिगा हुन्जिहता
वरोर नुनान मिकुन
दिसानुर, इद मिया
साटि उन्दि चिना मन्दार।”



स्वरगदूत इदाम इन्दिला आता अचोन बेरा अद स्वरगदूतसंग असा
स्वरगदूतक्रा उन्दि गोहडि परमेस्वरना स्तुति किस
दिसतुरक, “स्वरगतिगा परमेस्वरना हजोरपण
दिसिर अनि दरतितिगा परमेस्वर



बोनिगा गिरिदा
आन्तोर ओरकुन

शान्ति पुटि” इदाम इतोरका।



अनि स्वरगदूतक मेहवालोर हेरेटाल स्वरगतिके
हतुरक, असके मेहवालोरक वरोन दुसरोनासंग इदाम
इन्तोरक, “देट माक बेतलहेम हन्जुन इद पोल्लोतुन
पुच्चेमायकाट अनि प्रबु माकुन वेहता इद पोल्लोतुन
पळकसोर अद पोल्लो माक हुळकाटा”



अनि बेळांग मेहवालोरक सान्डे हन्जुन मरियम अनि
यूसुफिना हेरे कोळकातिगा हुन्जिहता नुनान हुळतुरका।



अनि पजा नुनालना बारेते स्वरगदूत ओरकुन
वेहच मता सबोय पोल्लो दुसरो सबोय लोकरकुन
वेहतुरक, अनि अद पोल्लो केन्जतोर सबोय
लोकरक बेळांग मेहवालोर ओरासंग वेहच मता अद
पोल्लोता बारेते आश्वरय आतुरका।



हेरोदेस राजाना काळदे
यहुदियाता बेलहेम
सहेरतिगा येसुना जनमा
आतु असके पूरव
दिशातिकेडाल
हुकोंगता बारेता
सोबाय

पुन्तोरक हुचुलोर ग्यानि लोकरक
येरुसलेमतिगा वातुरक, “यहुदियातोर
राजाल आस जनम आतोर बगा मन्तोर?
माक ओर जनम आतुर इदाम तोहान्ता ओद
हुको पूरव दिसाते हुळस ओन आरादना
कियालाय वातोरोम” इन्जोर पुच्चेमातुरा।



असके हेरोदेस राजाल पूरव देशताल
वातोर ओर ग्यानि लोकुरकुन मकस
केयसुन ओद हुको बोद बेरा
दिसतु इन्जोर ओरकुन पुच्चेमास
समजेमातुर। असके ओरकुन
बेतलहेम सहेरतिगा इदाम इन्ज
लोहतुर, “हन्ट, ओर नोनाना बारेते
सोबाय मालुम किम्ट, अनि ओन
हापळेमायनुर ते नाकुन समाचार
हिम्ट बाक्याकि नना वने हन्ज ओन
नमस्कार कियाका”
इन्जोर ओरकुन
इतुर।



राजाना पोल्लो केन्जुन ओरक हतुरक; अनि ओरक पूरव दिशातिके
हुळस मतोर ओद हुको नोनाल बगा मतोर ओद जागातिगा अवस
रोमनावनाह ओरा मुने मुने हन्जोर मता,
ओद हुको रोमतु इन्जोर हुळस ओरक
पकाय गिरदा आतुरका।



ओरक ओद लोन अवस ओर नोनान ओना अवहारि मरियमनासंगे
हुळतुरक अनि ओरक नोनाना काल अरस ओना आरादना कितुरक,

अनि ओरक आप-आपुना पकायि किमति
चिज इराना डब्बा तरियस ओन सोनो,
लोबान अनि दयमुर नियता भेट
हितुरका मति ओरक मल्लस हेरोदेसना

हेरे हन्माकिर इन्जोर
परमेस्वर उन्दि
कनिष्कानते ओरकुन
सावदान कितुर असके
ओरक दुसरो हरिते
आपुना देशते
हतुरका।



पूरव दिसाताल वातोरक ओर ग्यानि
लौकुरक हतुरक असके पजा प्रबुनोर
वरोर दूत यूसुफिन कनिष्कानबेरा दिस
ओन इतुर, “तेदा, ओर नोनान अनि
ओना अवहारिन पयस मिस्त्रि देशतिगा
मकस हन अनि अगा
मन्ट, अनि नना वेहवाय निमाट
मलस वायमाट बाक्याकि
हेरोदेस ओर नोनान हक्कान
साटि पळकानुर।”





असके ओर नरकाय तेदच नोनान अनि
ओना अवहारिन पयस मिस्त्रि देशतिगा
हतुर। अनि हेरोदेसना हायानवनाह
अगाय मतुरक।

“नना आपुना मरिन मिस्त्रि देशताल
केयस ततान” इदाम प्रबु
परमेस्वरना पोल्लो वेहवालोर
द्वारा इन्ज मतोर ओद पोल्लो
पुरा आयि इन्जोर इदाम आत।



अनि ग्यानि लोकरक ओनासंग दोखा
कितोर इदाम हेरोदेस राजाल समजेमास
ओर पकाय होंग आतुर, अनि ग्यानि
लोकरकुन पुच्चेमास समजेमातोर ओद
बेराता अनुसार रन्ड वरसातोर या रन्ड
वरसाताल हुडलोर मतोर सबोय नोनान
बेतलहेम अनि अदेना हेरे गुरेटांग सबोय
नाटेनिगा




लोकरकुन लोहच
हक्कस वाटतुर।



मति हेरोदेस हातपा पजा, प्रबुनोर दूत
मिस्रि देशतिगा यूसुफिन कनिष्कानते
दिसतुर, “नोनान हक्काना इच्चा
किन्दुर ओर हातुर इन्जोर निमा
तेदा, नोनान अनि ओना अवहारिन
पयस इस्रायेल देशतिगा हन”
इन्जोर इतुर।



मति यहुदिया प्रदेशतिगा अरखिलावुस आपुनोर
बाबो हेरोदेसना जागा राज
कियाला आतोर इन्जोर
केन्जुन अगा हन्दान साटि
वरियतुर, कनिष्कानते
परमेस्वरताल



चेतावनि पुटिहिच
गलील प्रदेशतिगा हतुर।
अनि “ओन नासरि इन्दानुर” इदाम परमेस्वरना
पोल्लो वेहवालोरा पोल्लो पुरा आयि इन्जोर ओरक
नासरत पोरोयता प्रदेशतिगा हन्ज मन्दिला लागतुरक।



परमेस्वर आपुनोर वरोरे मरिनिगा बोरायि
विस्वास केविर ते ओना नाश आयमाकि मति
ओन अनन्त काळता जिवा पुटि इन्जोर
परमेस्वर आपुनोर वरोरे मरिन हियान
साटि इद दरतिता लोकरकुन
पकाय मया कितुर।



रोमि 3:23 बाक्याकि सबोय लोकुरक पाप किसुन परमेस्वरना महिमाता
योग्य मनोर आतुरक,

रोमि 6:23 इन्जोर पापता मजदुरि हायाना मन्ता मति परमेस्वरना वरदान
मावोर प्रबु येसु मसिना द्वारा पुटता अनन्त जिवन मन्ता।

यहुदि 9:27 अनि सबोय मानेयक उन्दि बेरा हायानुर असके पजा परमेस्वर
न्याय कियाना पहाजे इदाम परमेस्वर निवळे किता मन्ता।

इफिसुस 2:8,9 बाक्याकि विस्वासता द्वारा दयातेय मिया पिसाना आता,
अनि इद मिकुन आपुना बुतोते पुटिला परो मति इद परमेस्वरना दान आन्दु।
बोरे इदेना अभिमानि केवो आयिकाट इन्जोर इद मावा किता बुतोता
कारणते वने आयो।



रोमि 10:9,10 “येसुये प्रबु आन्दुर” इन्जोर निमा आपुना टोडिते स्विकार
किस परमेस्वर ओन हातोरिगाडाल असा जिवेहकितोर इन्जोर निमा
आपुना मन्दिगा विस्वास किन्तोन ते निया पिसाना आयार इन्जोर
परमेस्वरना पोल्लो मन्ता। बाक्याकि पुरा मन्दे बोर इद विस्वास किन्तोर
ओने परमेस्वर आपुना मुने येताना योग्य ठहरे किन्तोर अनि बोर अदेन
आपुना टोडिते स्विकार किन्तोर ओने पिसानुर।

युहनाल 3:16,17 परमेस्वर आपुनोर वरोरे मरिनिगा बोरायि विस्वास
केविर ते ओना नाश आयमाकि मति ओन अनन्त काळता जिवा पुटि इन्जोर
परमेस्वर आपुनोर वरोरे मरिन हियान साटि इद दरतिता लोकुरकुन पकाय
मया कितुर। दरतिता लोकुरकुन दन्डता न्याय हेविर इन्जोर परमेस्वर
आपुनोर मरिन दरतितिगा लोहोर मति ओना द्वारा लोकुरकुन मुक्ति पुटान
साटि दरतितिगा लोहतुर।



१ युहनाल 5:11-13 अनि परमेस्वर माकुन अनन्त जिवा हितोर अनि इद जिवा ओनोर मरिनिगा मन्ता इन्जोर ओद गवाहि मन्ता। बोना हेरे मरि मन्तोर ओना हेरे अनन्त जिवन मन्ता अनि बोना हेरे परमेस्वरनोर मरि हिलेर ओना हेरे अनन्त जिवन वने हिले। परमेस्वरना मरिना पोरोयते विस्वास किन्तोरक मिकुन नना इव पोल्लोंग कोटान्तोना मिकुन अनन्त जिवन मन्ता ओद मिकुन पुन्दान साटि मन्ता।



मरकुस 1-2; लूका 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter; Sarah S.

Muria Far Western NT (fmu) © (Active) Wycliffe Bible
Translators, Inc. All rights reserved.

<https://www.bible.com/bible/3169/MAT.1.FMU>

©2025 Bible for Children, Inc.

www.M1914.org

www.bibleforchildren.org

